



Publicaziuns dalla vischnaunca, jamna 45

Lubientschas da baghegiar

L'istanza da baghegiar ha concediu suandonta lubientscha da baghegiar:

Nr. 2010-1050

Pendicularas Mustér SA, Via Acletta 2, 7180 Disentis/Mustér; bar cun restauraziun, parcella 500, Via Acletta 2, 7180 Disentis/Mustér.

Quella lubientscha sa vegnir contestada enteifer 30 dis dapi la publicaziun el Fegl uffical dalla Surselva tier la Dertgira administrativa dil cantun Grischun.

Disentis/Mustér, ils 11-11-2010
Uffeci da baghegiar Disentis/Mustér

Cussegl da vischnaunca

Il cussegl da vischnaunca seraduna **venderdis, ils 12 da november 2010 allas 19.30 uras** en stanza da seduta el plaunterren dalla casa communal ad ina seduta.

Tractandas:

1. Protocol nr. 12-2009/2012
2. Verificaziun dall'elecziun complementara dalla suprastanza communal dils 26 da settember 2010
3. Via Faltscharidas: Credit per la sanaziun (messadi nr. 18-2009/2012)
4. Postulat pertuccont retschercar l'interessenza sco era in adattau liug per cuminonzas da bargias da lenna da brisch per vischinas e vischins: Risposta dalla suprastanza communal (P 1-2009/2012)
5. Lescha forestala: Revisiun parziala (messadi nr. 20-2009/2012)
6. Preventiv 2011 (messadi nr. 19-2009/2012)
7. Agenda 2011 e damondas organisatorias

Il president dil cussegl da vischnaunca

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica.

Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu). Quellas lavurs ston esser finidas sil pli tard entochen la **fin da november 2010**.

En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il survetsch tecnic dalla vischnaunca cun adossar ils cuosts als proprietaris.

Disentis/Mustér, october 2010
Uffeci da baghegiar Disentis/Mustér

Seivs mobilas per la pasculaziun

Tenor art. 75, al. 1 dalla lescha da baghegiar ston seivs mobilas vegnir allontanadas immediat suenter la pasculaziun. En quei senn ston tuttas seivs per la pasculaziun vegnir allontanadas **entochen ils 30 da november 2010**. Quei vala era per seivs da gatter. Aschinavon che las seivs vegnan buca allonta-



nadas enteifer il termin indicau, vegnan quellas tenor basegns allontanadas sin donn e cuost dils proprietaris.

Disentis/Mustér, ils 28-10-2010
Uffeci da baghegiar Disentis/Mustér

Cuminonzas da bargias da lenna

En in postulat ha cusseglier Clemens Berther constatau, che beinenqual possessur d'ina pegna scalegl ni era d'ina platta da fiug hagi savens munconza da plaz per deponer la lenna da brisch. Ei seigi da beneventar ch'ins nezegi nossas resursas. El damonda, schebein la vischnaunca savessi metter a disposiziun prau ni pastira en dretg da baghegiar per construir cuminonzas da bargias da lenna da brisch.

Per saver eruir l'interessenza per realisar talas cuminonzas da bargias da lenna arranscha la suprastanza communalina ina retscherca davart igl interess per tals indrezs.

Interessai a talas deponias da lenna san s'annunziar cun indiar il spazi giavischau. Sin fundament dallas annunzias vegn la suprastanza communalina a prender las disposiziuns indicadas.

Las annunzias per basegns da magasinar lenna en volumen/m³, sco era giavischs per in liug preferiu ein da far entochen sil pli tard ils **30 da november 2010** agl uffeci da baghegiar. L'annunzia sto succeder a scret.

Disentis/Mustér, ils 2-11-2010
Suprastanza communalina

Sanaziun dalla via da rimnada «Via Faltscharidas» – Introducziun dalla procedura da contribuziun (perimeter)

Ils 10 da settember 2010 ha la suprastanza communalina publicau el Fegl official dalla Surselva l'intenziun d'introducir la procedura da contribuziun per la sanaziun dalla Via Faltscharidas. Ils 16 da settember 2010 ha la vischnaunca orientau ils proprietaris da terren davart il project e la procedura.

Encunter l'intenziun d'introducir la procedura da contribuziun ei vegniu inoltrau ina protesta sco era differentas objecziuns davart l'unium Fontauna da Faltscharidas. La protesta pertuccont l'appartenenza d'ina parcella al territori da contribuziun sto vegnir renviada. La gronda part dallas objecziuns dils vischins pertucca il proxim pass dalla procedura da contribuziun.

Il Cantun separticipescha buca alla sanaziun dalla sbuccada dalla via. La piazza da semanar vegn renaturalisada. Ils cuosts per la renaturalisaziun dil plaz da semanar surpren il Cantun.

La procedura da contribuziun succeda tenor las prescripziuns d'art. 58–64 dalla lescha davart la planisaziun dil territori (LPT) e d'art. 22–27 dall'ordinaziun davart la planisaziun dil territori dil cantun Grischun (OPT). Sin fundament d'art. 23, al. 3 OPT decida la suprastanza communalina definitivamein d'introducir la procedura da contribuziun per la sanaziun dalla Via Faltscharidas.

El medem mument vegn la protesta pertuccont l'appartenenza d'ina parcella al territori da contribuziun renviada. La lunghezia dil project per la sanaziun dalla via suttamessa alla procedura da contribuziun vegn buca reducida. Plinavon fixescha la suprastanza communalina definitivamein l'interessenza publica resp. privata, la part digl implont suttamess alla procedura da contribuziun sco era la cunfinaziun previda pil territori da contribuziun (perimeter).



Alla procedura da contribuziun vegnan suttamess:

Il cuosts per la sanaziun totala dalla via naven dalla Via Sursilvana entochen al profil QP 15, la cuvrida naven dil profil QP 15 entochen il profil QP 16 e la via naven dil profil QP 16 entochen il profil QP 18. Il cuosts totals per la realisaziun da quei project muntan approximativamein a frs. 600 000.–.

La suprastonza communal fixescha el senn dallas prescripziuns d'art. 63 dalla lescha davart la planisaziun dil territori dil cantun Grischun l'interessenza publica a 70% e la privata a 30%.

Il territori da contribuziun secuviera cul cunfin dalla zona da baghegiar a Faltscharidas. Plinavon vegnan igl intschess dalla zona d'explotaziun ella Val Sogn Placi, sco era ils baghetgs d'economia ella proxima vischinonza risguardai. Il territori suttamess alla procedura da contribuziun sorta dil plan da situaziun exponiu.

Il plan da situaziun cul project da baghegiar, il plan da situaziun cul territori suttamess alla procedura da contribuziun ed il conclus dalla suprastonza communal davart la fixaziun dall'interessenza publica resp. privata ein publicai naven dils **12 da november 2010** en casa communal (stanza nr. 10). Encunter la fixaziun dalla procedura da contribuziun, la fixaziun dall'interessenza publica resp. privata e la cunfinaziun dil territori da contribuziun sa vegnir recurriu enteifer 30 dis dapi la publicaziun ufficiala alla Dertgira administrativa dil cantun Grischun. La protesta sto vegnir inoltrada a scret ed ei da motivar.

Disentis/Mustér, ils 8-11-2010
Suprastonza communal Disentis/Mustér

Controlla da habitonts

Naschientscha

Lutz Leonie Josefina, naschida ils 25 d'october 2010, feglia da Lutz naschida Riedweg Helen Andrea e Roger.

Mortori

Pius Huonder-Manetsch, naschius ils 13-9-1923, morts ils 5-11-2010.

Uniun da dunnas Mustér

Messa da s. Elisabet, ils 19 da november 2010 allas 9.00 ella baselgia s. Gions.

Suenter messa pussevliadad da star in tec da cumpignia ella caffetteria dalla casa s. Gions tier in caffè.

Sin in seveser salida
Uniun da dunnas Mustér

Uniun da dunnas Mustér

Fiera da Nadal a Mustér

Sonda, ils 20 da november 2010 naven dallas 11.00 tochen las 22.00 sin la piazza da scola. Naven dallas 11.00 tochen las 16.00 han ils affons la pussevliadad da zambergiar ina decoraziun d'advent.



Uniun da Kneipp Surselva
Referat cun Bruder Franz dalla claustra da Mustér

Tema: Applicaziuns tenor sora Hildegard da Binningen.
Datum: Dumengia, ils 14 da november 2010
Liug e temps: Casa s. Gions, Mustér, allas 15.00.

Era buca commembers ein beinvegni.
Collecta per cuvierer ils cuosts.

Ludoteca Mustér

Liug/Ort: Halla Cons, tel. 076 494 39 92
e-mail: ludoteca@disentis.ch

Uras d'avertura / Öffnungszeiten:

Gliendisdis/Montag: 18.30–20.00
Gievgia/Donnerstag: 16.00–17.30
Venderdis/Freitag: 18.30–20.00

Vies team dalla ludoteca

Biblioteca populara Mustér
Notg svizra da raquens 2010
Egl uaul da historias

Ils scolars dalla 3. e 5. classa primara prelegian e raquentan historias e contan per Vus.

Cu: venderdis, ils 12 da november 2010
Rimnada: allas 16.30 sil plaz da scola avon la halla Cons
Cuoz: ca. 2 uras
Special: L'occurrenza ha liug da tutt'aura.

Setila en cauld. Sche ti has ina latiarna, sas ti prender ella cun tei (denton negins tizzuns!). Ei dat aunc ina pintga sorpresa!

Nus selegrein d'astgar beneventar biaras audituras e biars auditurs.

Ils affons, ils scolasts e la squadra dalla biblioteca populara Mustér

Biblioteca populara Mustér

Liug: Casa da scola, tel. 081 947 52 90, biblioteca@disentis.ch

Sut www.disentis.ch ni www.bibliotecas-surselva.ch anfleis Vus nies entir catalog bibliotecar. Per e-mail saveis Vus reservar ina ni pliras medias ed enteifer 5 dis retrer ad emprest ellas en biblioteca populara.

La biblioteca ei aviarta:

Gliendisdis 18.30–20.00 uras
Mardis 13.30–15.00 uras
Gievgia 16.00–17.30 uras
Venderdis 18.30–20.00 uras



Nies motto: Leger . . . tedlar . . . mirar . . . !
Nus selegrein da mintga viseta.
Biblioteca populara Mustér

Biblioteca populara Mustér
Praulas e historias cun Mats, la miur

Eis ti denter 2 e 6 onns? Has ti gust da vegnir cun tia mumma ni cun in'otra persuna d' accompaignament en biblioteca e tedlar praulas ni historias?

Mats, la miur e nus dalla biblioteca raquitein a ti ina praula ord in cudisch da nossa valischa da surprasas e quei mintga gada il **secund venderdis** dil meins dallas 14.30 entochen ca. allas 15.30.

Nus selegrein zun fetg sin tei ...

Tgisà, forsà anflein nus mintgaton aunc enzatgei auter che mo cudischs en nossa valischa da surprasas! Cun ils pli cars salids e sin seveser tochen gleiti

Mats, la miur ed il team dalla biblioteca populara Mustér